

մայրն, վանքիս և Թաղէոս առաքելոյ վանքի վանա-
հայր Գասպար եպիսկոպոս 1200 անձինքով սպանուած է:

Ճոռանցի Մաղաքիս եպիսկոպոս որ ս. սեղանի
գմբէթը և տաճարին աւերած տեղերն նորոգեց իսախ
փաշայի ձեռօք:

Այս Մաղաքիս եպիսկոպոս պատճառ եղած է
Բաղրեանդայ Հայոց գաղթելուն:

1765 թուականներուն Զաքարիա վ. իբրև նուիրակ
կը յղուի Էջմիածնից ի Բաղրեանդ ուր և առաջնորդ
կը հաստատուի: Սա տիրացու Պետրոսի ձեռօք թու-
նաւորել կը տայ Մաղաքիս եպիսկոպոսին, ինք կը յա-
ջորդէ, նոյն տիրացուն կը ձեռնադրէ վարդապետ, որ
քառասնից մէջ կը մեռնի:

Մկրտիչ եպիսկոպոս Շորոթեցի, Տաթևու միաբան,
իւր 12 միաբանով վանքս կը գայ, նորա յաջորդեց
Ճգնաւոր Մկրտիչ Գրգ, որոյ ևս Գալուստ, սորա ևս
Խաչատուր, որ յետոյ եղև անուանի:

Դա Զաքարիայի և Մկրտչի հոգեզաւակն էր:

Սորա ևս յաջորդեց Երեանցի Թուման վարդա-
պետ, որ քիչ օրէն վախճանեցաւ:

Յորմէ յետոյ Բաղրեանդայ Երանոս գիւղացի Սա-
հակ եպիսկոպոս առաջնորդ եղաւ, սա Նաւրուզ գիւ-
ղացի քաջութեամբ հռչակաւոր Ռէս Լլոն միշտ իւր
մօտ կը պահէր: Սորա օրովն այս վանքի մէջ Դանիէլ
կաթօւղիկոս ձեռնադրուեցաւ, Սահակ ևս Դանիէլից
նոյն վանքի մէջ եպիսկոպոս ձեռնադրուեցաւ:

Բատոյ եպիսկոպոս՝ քննութեան համար Էջմիած-
նէն վանքս եկաւ, յետոյ վանահայր կարգուեցաւ, ամ-
բաստանուեցաւ և պաշտօնանկ եղաւ:

Սորա յաջորդեց Երանոսցի Գալուստ վարդապետ: